

## Шунлтта көдлмш

1944 джилин эклцәр Менкеев Сохат Новосибирск областин Чистоозерн района Свердловин нертә колхозд адуч болдж орв. Даадж авсн мөрднъ дегәд эцсн, догълнъ-дөрв, дääртә бääс-мн. Мөрд асрлгъна эв меддг Сохат, цагтнъ өвс усинъ өгч, бääринъ цеврлдж-арчдж, өдр-сө уга чидлән нөл уга көдлв.

Теднә дегд эцсн, дääртә мөрдинъ онц бääрнд асрдж, норм деернъ немр өвс, арва өгч ясрулдж, үвләс цугтнъ менд гаргъв. Дуларад, ногъан көкрәд ирм цацу сән никт өвстә болн уста газруп адугъан көөдж авч оч идүлнә.

Кесг джилин эргцд адугъан сән чинәтәгъәр бәрәд, төлинъ сәәнәр авад, өсгәд, гару угагъар бәрсн төләдән үнтә белгәр болн магталин грамотар тер адуч ачлгдв.

1948 джилд нертә эн адучд колхозин ахлач ик гидг даалгъвр өгәд, өвсн - усар түрдж-зүддж бääх отарт ах хөөчәр орулв. Эки түрүндән ут-тур-

шдан 280 толгъа хө авч хәр-үлв. Орси өдрәсн авн Сохат, хойр күүкән дахулдж, хаша-хаалгъинъ дулалдж, цагтнъ услдж, идх өвсинъ болн концентрат цугтнъ белддж, хөөдән сәәнәр асрдж, үвлин зудас мел нег чигн гару угагъар менд гаргъв. Олн джилд хөөнә ард дахсн Сохат эн хөөдән торгън нооста тохмта хуцла харгъулдж, хөөдиннъ тохминъ ясрулдж авб.

Сибирин газр-усна бääдлд джил болгън хөөнә төлән гару угагъар бәрәд, сән ноос икәр авч, үзмджтә кевәр көдлсндән ах хөөч Сохат хөөдәр, гунджн үкрәр болн сарвагъар ачлгдв.

1956 джилин сүүләр хәләджәсн хөөдән 2500 толгъа болгъдж өсгв. 250 хө джил болгън государствд орулдж өгчәв. Дадмг хөөч Менкеев Сохат мал асрлгъна дамшлтан дорас өсдж йовх багъчудт үзүләд, Свердловин нертә колхозин наадк хөөчнрт үлгүр болдж йовна.

**В. БУРУЛОВ.**